

Wann man aber einen Ziegel in den Ofen setzt / vnd solchen glüen läßt / dann ein wenig Mercurii vivi nach dem andern mit einem Löffel hinein getragen / so fliegt er schnell darvon / vnd ein Theil desselben gehet in ein sawer Wasser / welches ich viel besser achte als Flores: Der übrige Mercurius welcher nicht zu Wasser wirdt / laufft wieder lebendig in das receptaculum: Vnd müssen gläserne Vasa distillatoria seyn / dann in den Erdenen verlieret sich das Wasser / vnd wirdt keines erlangt.

Mit solchem Mercurial. Wasser / welches also per se gemacht / were etwas zu künstlen / vnd solte vielleicht auch etwas guts darinn gefunden werden. Sonsten kan man solches eusserlich in allerhand Brägen vnd Venerischen Schäden gebrauchen.

## C A P U T    X X X V I I I .

### Flores vom Zinck.

**D**er Zinck / sonst Speuter genandt / ist gar ein wunder Metall / vnd befindet sich in seiner Anatomirung / daß es ein lauter vnzeitiger / reiner / güldischer Schwefel ist. Wann er auff die Kohlen gelegt wirdt / fliegt er alsobalden gang vnd gar darvon / zünd sich auch an / vnd verbrennt sich auch zum Theil gleich als ein gemeiner Sulphur, doch mit einer andern Farb / nemlich einer güldischen Purpur Flamm / vnd gibt gar schöne weisse vnd leichte Flores.

C A